

PEMBERITAHUAN PERTANYAAN BAGI JAWAPAN BUKAN LISAN

MESYUARAT PERTAMA, DEWAN RAKYAT

PENGGAL KELIMA, PARLIMEN KETIGA BELAS

MAJLIS MESYUARAT DEWAN RAKYAT

PERTANYAAN : JAWAB BUKAN LISAN

DARIPADA : DATUK WEE JECK SENG

[TANJUNG PIAI]

TARIKH : 7 MAC 2017 (SELASA)

SOALAN :

**Datuk Wee Jeck Seng [Tanjung Piai] MEMINTA MENTERI
PEMBANGUNAN WANITA, KELUARGA DAN MASYARAKAT
menyatakan apakah Kementerian menyemak semula program Desa Bina
Diri dalam membantu golongan papa dan gelandangan mencari kerja yang
sekurang-kurangnya kerja sambilan yang akan menyediakan mobiliti
sosial.**

JAWAPAN: YB DATO' SRI ROHANI ABDUL KARIM, MENTERI
PEMBANGUNAN WANITA, KELUARGA DAN
MASYARAKAT

Tuan Yang Dipertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) mempunyai 5 buah institusi Desa Bina Diri (DBD) yang memberi jagaan, perlindungan dan pemulihan kepada orang papa agar mereka menjadi produktif dan berkemahiran serta mempunyai sikap yang positif untuk diintegrasikan dalam masyarakat. Institusi tersebut adalah seperti berikut :

- i) DBD Mersing, Johor;
- ii) DBD Jerantut, Pahang;
- iii) DBD Kota Kinabalu, Sabah;
- iv) Pusat Sehenti Bina Diri Sungai Buloh, Selangor; dan
- v) DBD Kuching, Sarawak.

Tuan Yang Dipertua,

Bagi menyediakan penghuni DBD agar dapat diintegrasikan dalam masyarakat, mereka akan menjalani pemulihan, latihan kerjaya dan kemahiran (vokasional, pertanian, kraf tangan) bagi tempoh tidak melebihi 3 tahun.

DBD juga mengadakan program "*Job Opportunity*" kepada penghuni-penghuni yang boleh dilatih bagi menyesuaikan penghuni dengan alam pekerjaan. Program ini adalah merupakan inisiatif DBD dengan syarikat-syarikat swasta dan persendirian di kawasan berdekatan institusi untuk menempatkan penghuni di alam pekerjaan sebagai persediaan penghuni untuk diintegrasikan dalam masyarakat. Walau bagaimanapun, hanya segelintir penghuni yang boleh dilatih untuk menyesuaikan diri di alam pekerjaan kerana majoriti penghuni mempunyai masalah dari segi mental.

Peratusan kejayaan pemulihan di Institusi DBD adalah berdasarkan kepada penghuni yang mampu untuk mengurus diri selain tiada penyakit yang serius dan mereka yang mahu untuk berdikari. Mengikut rekod,

sebanyak 8% hingga 10% penghuni berjaya dipulihkan, melalui program-program di Institusi seperti pertanian, penternakan dan bengkel serta memberikan mereka peluang-peluang pekerjaan di luar Institusi.

Penghuni yang tidak produktif dan berpenyakit yang ramai di Institusi ini menyukarkan program-program pemulihan dilaksanakan. Keadaan ini menyebabkan institusi lebih ke arah penjagaan dan perawatan penghuni dan seterusnya bilangan penghuni akan semakin meningkat. Di bawah seksyen 8 Akta Orang Papa 1977, Penguasa hanya boleh melepaskan seseorang papa jika:

- i) Penghuni telah mendapat pekerjaan yang sesuai; atau
- ii) Diserahkan kepada keluarga / penjaga.

Kesimpulannya, KPWKM sentiasa komited untuk meneruskan usaha membela kesejahteraan sosial kumpulan sasaran agar mereka dapat menjalani kehidupan yang berdikari, berintegriti dan bermaruah sebagai sebahagian daripada anggota penting dalam keluarga, komuniti dan masyarakat secara inklusif.